

## Scuele: la ARLeF e consegne gnûfs tescj pai docents di furlan

A son stâts consegnâts intai plui di 330 ples scolastics dulà che si insegne il furlan. La iniziative e ven daûr ae creazion de “Rêt dai referents pal insegnament de lenghe furlane”

Il furlan a scuele lu sielzin plui dal 76% dai gjenitôrs. O fevelin di plui o mancun 40 mil arlêfs des scuclis de infanzie, primariis e secundariis di prin grât che, ogni an, a imparin la lenghe e la culture furlane, une vore dispès cun metodologjii didatichis di avanvuardie, tant che il CLIL. Lis fameis si dimostrin duncje simpri plui sensibilis ae tematiche, ancje in graciis di une cussience inressude su cetancj che a son i vantaçs cognitîfs, sociâls e culturâls di une educazion plurilengâl.

Propit par sostignî la valorizazion de lenghe furlane in ambit scolastic, e va indevant cence polse la ativitât de ARLeF - Agenzie Regionâl pe Lenghe Furlane, che in chestis setemanis e à consegnât materiâl didatic a supuart de ativitât dai docents intai plui di 330 ples scolastics dulà che si insegne il furlan (scuclis primariis, secundariis e de infanzie). «*La distribuzion dai materiâi a ducj i Istitûts dal teritori furlan - al à marcât il president de ARLeF, Eros Cisilino -, e vûl ufrî un supuart impuartant ae ufierte formative dai docents e duncje stimolâ la creativitât, l'interès e l'ûs atîf de lenghe furlane dai arlêfs*».

La iniziative e ven daûr ae creazion, tal mê di Març stât, de “Rêt dai referents pal insegnament de lenghe furlane” – che vuê a son 55 – promovude propit de Agenzie cun chê di facilitâ la distribuzion smirade di materiâl ludic didatic aes scuclis. Chest dut câs nol è l'unic obietîf de Rêt, stant che midiant di jê si podaran ancje ricevi consulencis linguistichis e didatichis, rindi plui facil il scambi di informazions, il confront e la condision di projets leâts ae lenghe furlane.

Il materiâl didatic consegnât, diversificât daûr dai ciclis scolastics, al è stât prontât par ogni insegnant di furlan su la fonde dal numar dai dâts inviâts, tai mê passâts, dai stes Istitûts. Cun di plui, al è stât metût a disposizion altri materiâl dedicât par ogni classe de Scuele de Infanzie.

Udin, ai 29 di Otubar dal 2021

### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<